

# SAKSFRAMLEGG

Saksbehandlar: Anne-Jorunn Bjørkum Leigvold  
Arkivsaksnr.: 18/38 - 14

Arkiv: A10

## Planlagt behandling:

Hovudutval for barn og unge  
Kommunestyret

## BARNEHAGEBRUKSPLAN 2018 - 2025

### Bakgrunn for saka:

Førre barnehagebruksplan (2017-2025) blei behandla i kommunestyret i møte 18.09.17. Saka blei sendt tilbake med ei bestilling om utnytting av eksisterande barnehagebygg skuleareal på Vasshus og på Horpestad.

For å få med innspel til dei viktigaste endringane i det nye planframlegget, blei denne planen også sendt på høyring som ein del av sakshandsaminga. Den er i tillegg orientert om i Kommunalt foreldreutval (KFU) og til styrarane før høyringa blei sendt.

Klepp kommune byggjer sine analysar på befolkningsutvikling, fødselar og analysar av bustadutvikling. Desse er fordelt på krinsane og målt opp mot barnehagane sin moglege kapasitet.

### Utfordringar

Barnetalet i kommunen har gått ned og flatar truleg ut og fleire barnehagar har ledig kapasitet. Dette skjer samstundes som barnehagar som ligg i pressområde har ventelister, noko som truleg skuldast at dei ligg der folk bur. På same tid har kommunen fleire ledige lokale som må vurderast nytten av.

Kommunen eig fire små barnehagar frå 1,5 avdeling til 2,5 avdelingar. I tillegg eig kommunen fire barnehagar med 3-4 avdelingar og seks større barnehagar med 5-7 avdelingar. Dei større barnehagar gjer eit større fagmiljø, er mindre sårbare ved sjukefråvær og er meir økonomisk lønnsame i drift. Ved endingar i behov kan større barnehagar lettare tilpassa seg. Små barnehagar er meir sårbare og vil på eit nivå måtte ha ei høgare bemanning for å halda ei forsvarleg bemanning. Konsekvensen av det er ein høgare kostnad pr. barnehageplass i kommunen sine egne barnehagar som igjen fører til høgare tilskot til dei private barnehagane.

Det er behov for å gjera barnehagane meir fleksible med omsyn til storleik og eit større fagmiljø.

I denne barnehagebruksplanen kjem desse momenta fram:

- Løysingar no, innafor dei barnehage-/skolebygget me har, for å tilpassa eit lågare barnetal.
- Planlegga for framtida med eit auka behov for barnehageplassar.
- Kriteria for utbygging og utvikling
- Kapasitet og behov

### Løysing no

Klepp kommune må slå saman einingar, både på kort sikt og planlegga større einingar på lengre sikt. Rådmannen foreslår derfor at det blir laga ein plan for samdrift av dei små barnehagane i ledige skulelokale inntil ein ny stor barnehage kan erstatta desse. Ut frå behov og økonomiske omsyn er det ikkje behov for denne barnehagen før truleg i 2025.

Bore barnehage er i leigde lokale og vert foreslått flytta til ledige lokale i saman med Vasshus barnehage frå august 2019. Dersom ikkje alle barna vert med til Vasshus, vil det vera ledig kapasitet i Kleppe og i Borsheim.

Steingarden barnehage vert lagt ned og overført til Horpestad barnehage når skulen flytter ut i 2022. Dersom ikkje alle barna blir med over til Horpestad, vil det vera ledig kapasitet i Kleppe til å handtera desse plassane. Lokala på Horpestad er 10 år gamle og kan flyttast rett inn i.

Då vil dei fire små barnehagane slått saman til to mellomstore barnehagar. Dersom barnetalet vert lågare enn berekna, kan nokre av desse endringane koma før.

### **Planlegga for framtida**

Etter barnehagelova § 8, 2. avsnitt: *har kommunen plikt til å tilby plass i barnehage til barn som bur i kommunen. Utbyggingsmønster og driftsformer skal tilpassast lokale forhold og behov.*

Klepp kommune må planlegga større barnehagar som er i nærmiljøet der folk bur. Nærmiljø må forståast som innafor eit par skulekretsar. Ved utbygging av nye bustadfelt vert det sett av tomt til barnehage. Klepp kommune har dei siste åra bygd barnehagar med 6-7 avdelingar. Fleire nabokommunar har bygd betydeleg større barnehagar og erfaringar tydar på at 8-10 avdelingar er ei høveleg storleik for framtida. Det bør likevel ikkje låsast, då dette kjem an på behov og moglege tomter.

### **Kapasitet og behov**

Etter analysar blir det lagt til grunn at Engelsvoll krins har underkapasitet på ca 30 barn, noko som truleg er løyst i Orstad krins som har ledig kapasitet.

Truleg vil ny barnehage på Anda løysa det auka behovet som kjem ved utbygging på Anda og Orstad. Det må derfor sjåast særskilt på ved rulleringa av planen i 2021.

Tu/ Tjøtta har ledig kapasitet og vil truleg ikkje ha noko auka behov i denne perioden.

Verdalen/Bore har i dag underkapasitet og det er behov for ein barnehage på Sporafjell. Løysinga med å flytta Bore til Vasshus er mellombels. Vasshus har allereie ledig kapasitet og avlastar Bore krins i dag.

Det er også ledig kapasitet i Kleppe og Horpestad i perioden.

### **Økonomi**

Eigedomsavdelinga har rekna på å bygga om Vasshus skule til å romme barn frå Bore barnehage. Det er plass til 35 barn totalt, men dei tilsette sine arbeidsrom må oppjusterast noko, i samsvar med krav. Uteområde på ca 100 m<sup>2</sup> vert omarbeidd.

Dersom heile Vasshus skule skal nyttast til barnehage, vil det vera andre krav som gjeld (Ved ombygging av meir enn 50% av bygget). Då vil kravet verte TEK 17, som betyr krav til energioptimalisering, ventilasjon og liknande. Det vil etter avdeling eigedom si vurdering ikkje vera økonomisk tilrådeleg framfor å byggja ein heilt ny barnehage.

Den totale kostnaden for omgjering av delar av skulen til barnehage vert 1,2 millionar.

Leigeforholdet til Bore bedehus har vore 350 000,- årleg, som innebar nedbetaling av lån for renover i tillegg til husleige. Frå 2018 er husleiga 170 000,- + straum og avgifter (230 000,-) For perioden 2019-2025 utgjer det 1.020 i husleige og 300 000,- i straum og avgift. I tillegg kjem vedlikehald som er nødvendig.

Vasshus barnehage har allereie avgiftene i sitt budsjett og bemanninga vil kunne utnyttast betre ved at eininga vert større. Det vert difor samla sett ei rimelegare løysing økonomisk sett.

### **Høyrings svar**

Det er kome inn 12 svar på høyringa:

*SU i Vasshus skule og barnehage* er positive til at ledige lokale på Vasshus vert planlagt nytta til større barnehage. Dei er einige i fordelane ved å slå saman små barnehagar til større. Dei er opptekne av at det må vera gode prosessar ved ei slik løysing. Vasshus barnehage har vore omtala i fleire planar og det skapar uro når det ikkje vert avklaringar. Dei framhev det unike uteområde og gymsal som ein særleg kvalitet på Vasshus.

*SU i Bore barnehage* ønsker ikkje å flytta «midlertidig» til Vasshus, men vil behalda barnehagen slik den er fram til Sporafjell barnehage står klar. Dei påpeikar utfordringar kring avstand og at kostnadene ved oppbygging av Vasshus skule vil verte større enn å fortsette å leige og å oppgradera Bore barnehage i same periode. Kostnadene må koma betre fram og dei ønsker at Sporafjell barnehage vert bygd ferdig før 2025.

*SU i Steingarden/Horpestad* meiner det er utfordringar kring flytting av Steingarden barnehage til Horpestad. Dei fleste barna som går i Steingarden barnehage, er busette i Kleppe sentrum og avstanden til Horpestad er ca 3,5 km, og det går ikkje buss. Lokala på Horpestad er gode, men SU er noko bekymra for framtida til Horpestad.

*SU i Tu barnehage* ønskjer å vita meir om kva som ligg i formuleringa «Modulane på Tu må oppgraderast og skal vera i bruk til Tu barnehage vert bygd ut». Dei meiner vidare at det er meir økonomisk tenleg å bruka pengane på nybygg i staden for oppgradering. Dei meiner også at dei kan auka kapasiteten og har god kollektivløysing.

*SU i Storhaug barnehage* meiner at når Steingarden vert lagt ned, kan desse barna flyttast til Storhaug i staden for til Horpestad. Storhaug er sentrumsbarnehage og ligg kun 1,5 km frå sentrum.

*SU i Kleppe friluftsbarnhage* støttar forslag om å flytta Bore til Vasshus og å få Sporafjell inn i planen att. Dei støttar ikkje forslaget om å flytta Steingarden til Horpestad. Dei grunngir dette med at Horpestad er usentralt og utan kollektivtransport.

*SU i Espira Ormadalen barnehage* støttar forslaget om større einingar. Dei uttrykker noko uro ved flytting av barnehagar ut av sentrum, sjølv om det er mindre einingar. Dei meiner vidare at barnehagane må leggest der folk bur. Barnehagen har god kapasitet og kan ta inn fleire barn.

*Trygge barnehagar v/ Kleppestemmen FUS barnehage* ønsker at det skal gå fram av vurderingane i punkt 5 at Kleppestemmen FUS barnehage har planar om utviding når behovet for auka barnehageplassar i Kleppe sentrumsområde blir ein realitet.

#### *Kommentar*

Barnehagebruksplanen skal rullerast i 2021 og ei ny vurdering av behov i Kleppe sentrum blir då vurdert. Dei private barnehagane i Kleppe er del av Klepp kommune sin barnehagebruksplan og Kleppestemmen FUS barnehage sine planar om utbygging vert lagt inn i planen.

#### *Fagforeningane*

*Fagforbundet* meiner at åtte avdelingar bør vera maks størrelse og nedre grense bør vera fem avdelingar. Sporafjell bør byggjast som åtte avdelingar. Dei støttar forslaget om å

midlertidig flytting av Bore barnehage til Vasshus inntil Sporafjell barnehage er klar. Vidare foreslår dei at Borsheim barnehage overtar Eirik Raude senter. Forslag om å flytte Steingarden til Horpestad vert støtta, men dei ønsker det som ei midlertidig løysing til Sporafjell barnehage er ferdig.

*Utdanningsforbundet* ønsker at den nedre grensa på barnehagar skal vera 5 avdelingar og at den øvre grensa vert 8 avdelingar. Utdanningsforbundet meiner at flytting av barnehagar ut av sentrum vil strida mot prinsippet om «barnehageplassar i nærmiljøet». Dei meiner likevel at Bore, Vasshus, Steingarden og Horpestad i fleire år har vore i ei usikker framtid og at det er naudsynt å ta ei avgjerd for ei meir forutsigbar framtid.

*Delta* er positive til at små einingar vert større. Dei meiner likevel at Bore barnehage framleis bør vere i nærmiljøet og ikkje flyttast til Vasshus. Sporafjell barnehage bør byggast snarast råd.

### **Rådmannen si vurdering:**

#### *Behov for barnehagar i Klepp i perioden 2018-2025*

Kapasiteten på barnehageplassar er samla sett god og det vil vera mange år før det er behov for fleire nye barnehageplassar. I nokre krinsar er det overkapasitet, medan det i andre område er underkapasitet.

Sjølv med middels vekst vil Klepp ha tilstrekkeleg med barnehageplassar. Nokre av dei ledige plassane er i barnehagar som er der færre folk bur. Det er foreldra sine ynskje om barnehage som kjem til syne i forhold til å sjå kor det er ledig kapasitet.

Foreldra gjer uttrykk for at dei ynskjer barnehageplass i nærleiken av der dei bur, og dette kjem også fram i høyringssvara. I dag har kommunen barnehagar spreidd utover heile kommunen. Fleire barnehagar ligg utanom tettstadar og det er nødvendig å køyra til barnehagen. Avstandane er likevel korte samanlikna med kommunar med stort areal. Klepp kommune eig mange små barnehagar og det er ønskeleg med større einingar. Dei fleste høyringssvara støttar også denne vurderinga. Det er nødvendig å gjera nokre tiltak for å tilpassa dagens barnehagar til eit endra behov.

Det er avgjerande at løysingane for Bore og Vasshus barnehagar er avklara i god tid før søknad om barnehageplass frå hausten 2019. Søknadsfristen er sett til 1.mars.

### **Vedlegg:**

- Barnehagebruksplanen 2018-2025  
Svar på høyring frå:
- SU i Vasshus skule og barnehage
- SU i Steingarden/Horpestad barnehage
- SU i Bore barnehage

### **Innstilling:**

Rådmannen foreslår at saka går til hovudutval for barn og unge og kommunestyret med slik tilråding:

1. Barnehagebruksplan 2018-2025 blir godkjent.
2. Bore barnehage blir flytta til Vasshus barnehage med oppstart august 2019. Delar av Vasshus skule blir sett i stand til barnehagedrift og midlar blir sette av i budsjett 2019 til føremålet.

3. Sporafjell barnehage blir lagt inn i økonomiplanen. Ny barnehage skal ta imot barn frå Bore og Vasshus barnehage, samt ha kapasitet til ytterlegare avdelingar. Sporafjell barnehage bør stå klar i 2025 og blir ein kommunal barnehage.
4. Steingarden barnehage blir nedlagd og overført til Horpestad frå 2022.
5. Ny rullering av barnehagebruksplanen skjer i 2021.

Rådmannen i Klepp 16.10.2018

*Dokumentet er elektronisk godkjent og treng derfor ingen signatur.*